

BIBLE 316

Biblia ni nini?

Biblia ni nini? Ni Mungu akizungumza nawe. Haihusu Mungu tu. Inatoka kwa Mungu. Ni zaidi ya kutiwa moyo. Imevuviwa na Mungu. Isome. Isikilize. Fikiria juu yake. Jifunze kutoka kwayo. Tumia mafundisho yake katika maisha yako. Mtume Petro aliandika, *"Kama watoto wachanga, waliozaliwa sasa, yatamanini maziwa ya kiroho yasiyochanganywa na kitu kingine chochote, ili kwa hayo mpate kukua katika wokovu,"* 1 Petro 2:2.

Ni nini kinachofanya Biblia kuwa ya kipekee? Vitabu vyake 66 viliandikwa katika lugha tatu (Kiebrania, Kiaramu, na Kigiriki) na wanaume zaidi ya arobaini kwa muda wa takriban miaka 1,600 hivi ikiwa na mada moja isiyobadilika na yenye upatano iliyoandikwa katika karne zote. Agano Jipya limethibitishwa kupitia zaidi ya hati 5,000 za kale kamili au sehemu. Usahihi wa Biblia umethibitishwa katika utimizo wa unabii wake, kupitia uvumbuzi wa kiakiolojia wa kisasa, katika usahihi wa kijiografia na katika hekima ya Mithali isiyo na kikomo cha wakati. Biblia ndicho kitabu muhimu na chenye ushawishi zaidi kuwahi kuandikwa. Hakuna kitabu kingine ambacho kimechapishwa nakala nyingi zaidi, kimesambazwa sana, kimetafsiriwa katika lugha nyingi zaidi, kilichobadilisha maisha ya watu wengi zaidi kwa nguvu na kilichodumu kwa karne nyingi sana. Biblia ndiyo mamlaka kuu katika kile tunachopaswa kuamini na jinsi tunavyopaswa kuishi. Biblia ina nafasi ya kipekee juu ya vitabu vingine vyote.

Je, sifa za Biblia ni zipi?

Biblia imevuviwa na Mungu. *"Maandiko yote yamevuviwa na Mungu,"* 2 Timotheo 3:16.

Biblia ni kweli. Yesu aliomba, *"Uwatakase kwa ile kweli; neno lako ndilo kweli,"* Yohana 17:17.

Biblia ni sahihi hata kwa maelezo yake ya kina. Yesu alisema, *"Kwa maana, amin nawaambia, hadi mbingu na dunia zitakapopita, hakuna hata herufi moja ndogo wala nukta itakayopotea kwa namna yoyote kutoka kwa Sheria, hadi kila kitu kiwe kimetimia,"* Mathayo 5:18. Usahihi wa hati asili umedumishwa hivi kwamba tafsiri bora zaidi za neno kwa neno za leo zina usahihi wa zaidi ya asilimia 99.

Biblia ni safi. *"Maneno ya BWANA ni safi, kama fedha iliyosafishwa katika tanuru, iliyosafishwa mara saba,"* Zaburi 12:6.

Biblia inadumu milele. *"Majani hunyauka na maua huanguka, lakini neno la Mungu wetu ladumu milele,"* Isaya 40:8. Biblia ni muhimu leo sawa na wakati ilipoandikwa mara ya kwanza.

Biblia ina nguvu. Waebrania 4:12, *"Kwa maana neno la Mungu li hai tena lina nguvu. Lina makali kuliko upanga wowote wenye makali kuwili, hivyo linachoma hata kuzigawanya nafsi na roho, viungo na mafuta yaliyo ndani yake; tena li jepesi kuyatambua mawazo na makusudi ya moyo."*

Je, kuna manufaa gani ya kibinafsi kutoka kwa Biblia?

Biblia hututayarisha. *"Maandiko yote yamevuviwa na Mungu, na yafaa kwa mafundisho, kwa kuwaonya watu makosa yao, kwa kuwaongoza na kwa kuwafundisha katika haki, ili mtu wa Mungu awe amekamilishwa, apate kutenda kila kazi njema,"* 2 Timotheo 3:16-17.

Biblia hutusaidia tusitende dhambi. Zaburi 119:9, 11 unatuambia jinsi ya kufanya hivyo. *"Kijana aisafishe njia yake jinsi gani? Ni kwa kutii, akilifuata neno lako"* na *"Nimelificha neno lako moyoni mwangu ili nisikutende dhambi."*

Biblia hutupa mwongozo wa leo (hatua yetu inayofuata) na mwelekeo wa maisha yetu ya baadaye (njia ya kufuata). *"Neno lako ni taa ya miguu yangu na mwanga katika njia yangu,"* Zaburi 119:105.

Biblia hutoa hekima. *“Kuingia kwa maneno yako kunaleta nuru, kunampa mjinga ufahamu,”* Zaburi 119:130. Hekima isiyo na kikomo cha wakati inapatikana katika Mithali katika Agano la Kale.

Biblia hutusaidia katika magumu. Zaburi 119:50 unatutia moyo, *“Faraja yangu katika mateso yangu ni hii: Ahadi yako inahifadhi maisha yangu.”*

Biblia hutoa tumaini. *“Kwa maana kila kitu kilichoandikwa zamani, kiliandikwa kutufundisha, ili kwa saburi na faraja tunayopata katika Maandiko tuwe na tumaini,”* Warumi 15:4.

Biblia hutupa amani. Zaburi 119:165 unaahidi kuwa, *“Wanaopenda sheria yako wana amani tele, wala hakuna kitu kinachoweza kuwakwaza.”*

Biblia huleta furaha. Yeremia 15:16 unatupa mfano, *“Maneno yako yalipokuja, niliyala; yakawa shangwe yangu na furaha ya moyo wangu, kwa kuwa nimeitwa kwa jina lako.”*

Je, mtu anapaswa kusoma au kusikiliza Biblia vipi? Chunguza zaidi ya mstari mmoja. Zingatia makusudi manne ya *“Maandiko yote yamevuviwa na Mungu, na yafaa kwa mafundisho, kwa kuwaonya watu makosa yao, kwa kuwaongoza na kwa kuwafundisha katika haki,”* 2 Timotheo 3:16. Unaposoma au kusikiliza, jiulize maswali haya manne. Je, inanifundisha nini? Je, inanionyaje? Je, ninahitaji kufanya marekebisho gani? Je, inanifundisha katika haki kwa njia gani?

Je, itakuwaje ikiwa sina Biblia? Fanya juhudi uwezavyo kununua tafsiri nzuri ya Biblia. Ikiwa huwezi kununua, biblia nyingi za kusoma au kusikiliza zinapatikana mtandaoni bila malipo. Unaweza pia kununua Biblia pamoja na rafiki au marafiki na kisha muitumie pamoja. Au liombe kanisa lako au waumini wenzako wamteue mtu mmoja asome Biblia kwa kikundi na msikilize kwa makini. *“Wamebarikiwa zaidi wale wanaolisikia neno la Mungu na kulitii,”* Luka 11:28.

Je, baadhi ya mistari maalum kwa walimu wa Biblia na viongozi ni gani? Kuwa mwanafunzi wa Yesu anayedumu (kuishi) katika Neno. *“Kisha Yesu akawaambia wale Wayahudi waliomwamini, ‘Ninyi mkikaa katika neno langu, mmekuwa wanafunzi wangu kweli kweli,’”* Yohana 8:31. Jifunze Biblia ili ukubaliwe. *“Jitahidi kujionesha kwa Mungu kuwa umekubaliwa naye, mtendakazi asiye na sababu ya kuona aibu, ukilitumia kwa usahihi neno la kweli,”* 2 Timotheo 2:15.

Je, Biblia ni muhimu milele kwa nini? Mtume Yohana alieleza kusudi lake katika kuandika Injili yake. Kusudi hilo linaweza kutumika katika Biblia yote. *“Yesu alifanya miujiza mingine mingi mbele za wanafunzi wake, ambayo haikuandikwa katika kitabu hiki. Lakini hii imeandikwa ili mweze kuamini ya kuwa Yesu ndiye Kristo, Mwana wa Mungu, na kwa kumwamini mpate uzima katika jina lake,”* Yohana 20:30-31. Je, unawezaje kumwamini Yesu na kupata uzima wa milele? Fahamu jinsi ya kufanya hivyo katika www.Gospel316.org.

“Majani hunyauka na maua huanguka, lakini neno la Mungu wetu ladumu milele.” Isaya 40:8